

Mo pli trais inscunters interrumentschs l'onn

La radunanza generala da l'URB ha gè lieu ultimamain a Turitg

■ (anr/am) Johannes Flury, president da la Lia Rumantscha, e Ladina Heimgartner, directura dad RTR, han referì a la radunanza generala da l'URB a Turitg. Els han era preschantà lur nova pagina d'internet. «Schi's dà ün sguard inavo nun es la discussiun a regard rumantsch grischun ed idioms gnanca statta uschè mala. Anzi, bleras Rumantschas e bliers Rumantschs sun gnüts plü activs durant quel temp e s'ingaschan uossa pel rumantsch», ha ditg Jon Carl Tall durant ses discurs d'avertura, el è dapi otg onns president da l'Unìun da las Rumantschas e dals Rumantschs en la Bassa (URB). Radund quaranta persunas eran preschentadas. Tenor Tall è il rumantsch in linguatg viv ed adina en moviment. El e ses consuprastants han tranter auter preschantà las activitads da l'URB durant l'onn 2015. Sper ils inscunters interrumentschs ch'èn vegnids reducids sin trais l'onn e che han gè lieu a Turitg han els era fatg attent sin lur nova pagina d'internet

ch'è en la rait dapi l'onn passà. La supranza, che ha davent da quest onn nov be pli sis commembers, ha era dà in sguard vers il futur: quest onn ha per l'emprima giada lieu in inscunter interrumentsch a Berna.

Bun contact tranter l'URB e la Lia Rumantscha

Jon Carl Tall è sco represchentant da las uniuns affiliadas en la supranza da la Lia Rumantscha. Tenor Tall è quai er in motiv per il bun e stretg contact che la URB ha cun la Lia Rumantscha (LR). Johannes Flury, ch'è dapi l'onn passà president da la LR, era er preschent a la radunanza generala da l'URB. El ha rapportà da sias experientschas ch'el ha fatg dapi ch'el è en il nov uffizi. Era la Lia Rumantscha s'occupa da las Rumantschas e dals Rumantschs en la Bassa che savessan, tenor Flury, far ora bunamain la mesadad dal dumber dals Rumantschs. L'autra dumonda ch'è resultada da la discussiun da-



La supranza da l'URB: Simon Denoth, Erica Vonmoos, Jon Carl Tall, Lidia Deuber e Gaudenz Cavegn (da san.).

FOTOS A. MÜLLER



Johannes Flury rapporta als preschents a la radunanza generala da sias experientschas ch'el ha fatg dapi ch'el è en ses nov post sco president da la Lia Rumantscha.



Ladina Heimgartner, directura dad RTR, metta grond pais sin ils basegns da las Rumantschas e dals Rumantschs en la Bassa pertugant radio e televisiun en linguatg rumantsch.

vart dals Rumantschs en la diaspora era co insumma definir il pievel rumantsch. Per sclerir quellas ed anc diversas autras dumondas organischa la Lia Rumantscha ils 11 da zercladur ina dieta a Cuir en Chasa Rumantscha. Quel arranschament è public e duai mussar la via che la supranza cun Flury a la testa duai ir en il futur.

Nua èn las Rumantschas ed ils Rumantschs?

Ladina Heimgartner, directura da Radiotelevisiun Svizra Rumantscha (RTR), ha referì durant la part tematica a la radunanza generala da l'URB. Ella s'allegra fitg da pudair esser qua,

perquai che las Rumantschas ed ils Rumantschs en la diaspora sajan era per RTR fitg impurtants, ha ditg Heimgartner. Durant sia preschentaziun ha ella alura dà als preschents in'invista en ses mintgadi sco directura dad RTR. Spezialmain allegraivel è tenor ella las autas cifras da visitaders da lur nova pagina d'internet rtr.ch. Tuttina vesa Heimgartner en las novas tecnologias er ina fitg gronda sfida per RTR. «En il futur ha RTR da s'establi en il mund digital e quai è ina chausa custavla e natiralmain vul RTR porscher vinvant schurnalisssem dad auta qualidat», quai n'è tenor Heimgartner betg ina simpla incumbensa.

Er ils basegns dals preschents sco represchentants da las Rumantschas e dals Rumantschs en la Bassa areguard radio e televisiun han interessà Heimgartner. Ella vuleva tranter auter savair tge ch'els spetgian dad RTR. Sche lur gavisch saja che RTR rapportia en prima lingia da temas or dal territori tradiziunal rumantsch u sch'els as giavischian era pli savens reportaschas davart da las Rumantschas e dals Rumantschs en la Bassa. I saja baingea gavischè che RTR rapportia qua e là era dals Rumantschs en la diaspora, ma en prima lingia vulessan els però vegnir infurmads sur da las actualitads en il Grischun.